

Z'spat

Silberbüx

Begleitung: Am E

Bin uf em Schuelweg gstolperet, voll in Dräck
S'Röckli verrisse etz hets en Fläck
Das chan ich doch nöd si lah
Drum han i nomal churz müesse hei gah

Händ bim feine Spaghetti-Zmittagässe
Leider d Ziit komplett vergässe
Drum hät de Papi mich uf s'Velo gnoh
Sind aber nöd gnueg schnäll de Hügel ufe cho


Stärnecheib wo sind ihr gsi?
Achtisch scho lang verbi! Aber sie!

En Vogel isch usem Näschtli gheit
Bin los grännt, ha's am Opa gseit
Underdesse flüügt de Cheib devo
Mer chömed zrugg, er isch nüme do

Min Daggel hät mini Ufzgi gschnappt
Drum han ich en mit em Chugi gjagt
Mit de Blätter isch er d'Stäge durab
Drum bin i etz halt zimmi knapp

Die Usred isch doch blöd!
Die glaubsch du dir doch sälber nöd! Aber sie!

Refrain



Ich bin doch etz da. Die paar Mi-nü-tli
sind nöd schlimm. Was ma-ched Sie es Dra-ma. Das liit no lo-cker
drin. Ich bin doch etz da. Die paar Mi-nü-tli
sind nöd schlimm. Was ma-ched Sie es Dra-ma. Das liit doch ab-so-lut no drin.

Bi mim Mami ihrem Auto isch de Motor abgsoffe
Drum simmer denn zäme i d'Schuel ufe gloffe

Ich han wie wild mis Trottschloss gsuecht
Und han vor Wuet luut ume gfluecht

Gar gar niemert erinneret mich dra
Dass ich hüt Nami i d'Schuel muess gah

Mir händ oisi Geiss
Mit es bitzli Fuetermais
Welle is Ghag ine locke
Aber sie hät agfange bocke

Ich hinke hüt de Ziit hinedri
Wills i mim Bett so bequem isch gsi

Ich han de doofi Bus verpasst
Er isch mer vor de Nase wegrast
De nöchshti Bus wär z'spat gsi
Drum ränn i am erschte grad hinedri
Ich han denn so schlimms Siitestäche übercho
Drum hani de nöchscht Bus wieder hei gnoh

Tipp: Erfinde eigene Ausreden in Reimform.

